

Pendidikan berkualiti bentuk pelajar berakhlak mulia

Oleh : Dk. Siti Redzaimi Pg. Haji Ahmad
Foto : Haji Ariffin Mohd. Noor / Morshidi, Mohd.
Sahrizal Haji Said, Azmah Haji Ahad

BANDAR SERI BEGAWAN, Isnin, 23 September. - Pendidikan berkualiti membawa maksud yang holistik di mana ia diukur bukan sahaja dari aspek prasarana pendidikan yang canggih dan teknologi pengajaran dan pembelajaran yang terkini, malah juga dilihat dari aspek kualiti guru, peluang pembelajaran yang saksama kepada semua peringkat pelajar serta kurikulum yang selari dengan tuntutan agama dan perubahan masa.

Pendidikan yang berkualiti akan dapat membentuk pelajar yang memiliki akhlak mulia, jati diri yang jitu, mampu berfikir secara kritikal dan kreatif serta mempunyai kedayatanganan untuk menghadapi cabaran-cabaran kesan daripada kemajuan teknologi, sosial dan ekonomi.

Demikian yang digariskan dalam sembah alu-aluan oleh Menteri Pendidikan, Yang Berhormat Dato Seri Setia Awang Haji Hamzah bin Haji Sulaiman pada Majlis Sambutan Hari Guru

Ke-29 Tahun 2019 yang berlangsung di Pusat Persidangan Antarabangsa (ICC), Berakas.

Yang Berhormat Menteri Pendidikan seterusnya menyebarkan bahawa Kementerian Pendidikan melalui Pelan Strategik 2018 - 2022 sedang melaksanakan inisiatif-inisiatif strategik, tindakan-tindakan dan hasil-hasil utama yang tertentu ke arah mencapai hasrat pendidikan berkualiti demi kecemerlangan pelajar.

Pada keseluruhannya jelasnya, semua itu adalah sejajar dengan Petunjuk Prestasi Utama Kebangsaan bagi Kementerian Pendidikan ke arah mencapai matlamat Wawasan Negara iaitu rakyat yang berpendidikan dan berkemahiran tinggi, dan menjurus kepada penghasilan sistem pendidikan yang saksama merangkumi kualiti guru, pelajar mahupun sekolah; memberikan peluang pendidikan yang luas dan pembangunan sumber tenaga manusia yang cemerlang.

Selain itu, Yang Berhormat menegaskan bahawa kriteria dan proses pengambilan dan pemilihan bakal guru telah mula dikemaskinikan sebagai usaha untuk memastikan guru-guru kita adalah benar-benar berkelayakan.

Menurutnya, usaha transformasi ini juga diharapkan akan meningkatkan tahap guru di negara ini sebagaimana jua yang disasarkan oleh Petunjuk Prestasi Utama Kebangsaan 2035.

"Kementerian Pendidikan adalah sentiasa komited untuk memberikan pendidikan yang berkualiti. Ke arah ini, Kementerian Pendidikan akan terus menilai tahap pendidikan yang ada agar ianya sentiasa relevan dengan penanda aras piawaian antarabangsa seperti melalui Kajian Utama bagi Programme for International Student Assessment (PISA)," ujarnya.

Jelas Yang Berhormat lagi, dapatan daripada usaha menanda aras ini akan dapat menilai pencapaian dan juga mengenal pasti jurang para pelajar dalam memiliki dan mengaplikasi kemahiran serta kompetensi yang diperlukan di abad ke-21.



MENTERI Pendidikan, Yang Berhormat Dato Seri Setia Awang Haji Hamzah bin Haji Sulaiman dalam sembah alu-aluan pada Majlis Sambutan Hari Guru Ke-29 Tahun 2019 yang berlangsung di Pusat Persidangan Antarabangsa, Berakas.

Di peringkat pengajian tinggi pula katanya lagi, usaha-usaha terus dilaksanakan dalam memastikan penyampaian kualiti pendidikan tinggi yang cemerlang.

"Dari pendidikan teknikal dan vokasional, politeknik hinggalah universiti, pelan-pelan strategik, perisian kurikulum, kursus-kursus yang ditawarkan dan hubungan dengan industri adalah sentiasa direbui serta dimantapkan bagi penjejajaran dengan kehendak industri dan pasaran pekerjaan yang memerlukan tenaga manusia yang mahir, berdaya saing, berdaya tahan, inovatif dan bersifat keusahawanan," tambahnya.

Dalam memastikan sumber tenaga manusia di negara ini sentiasa relevan dan mampu

menyelusuri revolusi perindustrian ke-empat, Yang Berhormat menyatakan bahawa penyediaan wadah bagi pembelajaran sepanjang hayat mempunyai keutamaan yang tinggi.

Sehubungan itu tambahnya lagi, institusi-institusi pengajian tinggi di negara ini giat melaksanakan usaha pembudayaan pembelajaran sepanjang hayat dengan menubuhkan pusat-pusat yang menawarkan kursus-kursus yang bukan sahaja bertumpu kepada kursus-kursus akademik bahkan kursus-kursus yang menjurus kepada kemahiran hidup dan penambahan ilmu pengetahuan Al-Quran dan Ilmu Fiqh sepertimana jua yang ditawarkan di Universiti Islam Sultan Sharif Ali (UNISSA).

Tip

KESIHATAN

NASIHAT KESIHATAN SEMASA JEREBU

JEREBU boleh menyebabkan kesan-kesan alahan (allergy) seperti gatal-gatal kepada tubuh badan termasuk mata, hidung dan kerongkong yang boleh menyebabkan batuk, selesema, mata berair dan kesukaran bernafas.

Jerebu juga boleh memudaratkan lagi keadaan bagi mereka yang menghidap penyakit jantung atau paru-paru yang kronik seperti asma (ampus).

LANGKAH-LANGKAH MELINDUNGI DIRI DARIPADA KESAN AKIBAT JEREBU TERHADAP KESIHATAN TERMASUKLAH :

- 1** Mengelakkan daripada berada di luar rumah untuk jangka masa yang lama. Mengurangkan aktiviti di luar rumah.
- 2** Jika tidak dapat dielakkan, gunakan penutup muka (face mask) yang sesuai untuk menutup mulut dan hidung awda.
- 3** Mengamalkan kebersihan diri pada setiap masa seperti mencuci muka dan tangan sebaik saja masuk ke dalam rumah.
- 4** Banyakkan meminum air bagi mengelakkan daripada dehidrasi terutama semasa cuaca panas.
- 5** Menggunakan krim atau losyen pelembap bagi kulit yang kering.
- 6** Menggunakan cecair titik mata yang tidak mempunyai bahan pengawet (preservative-free eye drops) jika mata terasa pedih.

Walau bagaimanapun, jika terdapat tanda-tanda seperti demam selesema berpanjangan, alahan (allergy) dan kesukaran bernafas, orang ramai adalah dinasihatkan untuk mendapatkan rawatan segera di pusat-pusat kesihatan yang berhampiran atau di hospital-hospital.

Maklumat lanjut mengenai kesihatan boleh diperolehi dengan menghubungi Talian Darussalam 123 atau dengan melayari laman sesawang Kementerian Kesihatan di www.moh.gov.bn

Sumber : Kementerian Kesihatan, Maklumat lanjut sila hubungi 123

